



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA SITA

Kikao cha Thelathini na Tatu – Tarehe 22 Juni, 2017.

Kikao Kitaanza Saa 3.00 (Tatu) Asubuhi
na Dua itasomwa.

I. HATI ZA KUWASILISHA MEZANI:

Waziri wa Nchi, Ofisi ya Makamo wa Pili wa Rais:

Taarifa ya Utekelezaji wa Maazimio ya Hoja ya Baraza la Wawakilishi kuhusiana na Uingizaji na Utumiaji wa Madawa ya Kulevya Zanzibar.

Waziri wa Nchi, Ofisi ya Makamo wa Pili wa Rais:

Taarifa ya Utekelezaji wa Maazimio ya Hoja ya Baraza la Wawakilishi Kuhusiana na Uimarishaji wa Mfumo mzima wa Kisheria Unaohusiana na Uendeshaji wa Kesi za Udhalilishaji wa Wanawake na Watoto.

II. MASWALI:

Ofisi ya Rais, Tawala za Mikoa, Serikali za Mitaa na Idara Maalumu za SMZ:

92. MHESHIMIWA JAKU HASHIM AYOUB (Jimbo Paje) - Atamuuliza Mheshimiwa Waziri wa Nchi (OR) Tawala za Mikoa, Serikali za Mitaa na Idara Maalumu za SMZ:

Serikali ya Mapinduzi wa Zanzibar imekuwa na nia nzuri ya kuimarisha sekta ya usafiri wa umma Zanzibar na hivi karibuni kumeanza mpango wa kulifanya eneo la Kijangwani kuwa kituo kikuu cha daladala. Hata hivyo, ni muda mrefu sasa tokea eneo hilo walipoondoshwa wafanyabiashara wa mbao halijaanza kutumika kama lilivyokusudiwa, huku wafanyabishara hao wakiendelea kukosa riziki zao.

Je, mpango wa kuweka kituo kikuu cha daladala Kijangwani (stand) utaanza lini.

Wizara ya Elimu na Mafunzo ya Amali:

177. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Elimu na Mafunzo ya Amali:

Kumekuwa na changamoto nyingi kwenye skuli zetu Unguja na Pemba ambazo nyengine Uongozi wa Wizara hauzijuwi kwa vile hawafiki kwenye maeneo yenye changamoto hizo kama inavyopasa.

Je, Uongozi wa Wizara umejipanga vipi kuhakikisha wanapita kila mara kujuwa matatizo ya skuli na taasisi za elimu Unguja na Pemba

Wizara ya Kazi, Uwezeshaji, Wazee, Vijana, Wanawake na Watoto:

131. MHESHIMIWA OMAR SEIF ABEID (Jimbo la Konde)
- Atamuuliza Mheshimiwa Waziri wa Kazi, Uwezeshaji, Wazee, Vijana, Wanawake na Watoto:

Kwa kuwa Wizara ilipanga kuimarisha mabaraza ya watoto kwa kila Shehia na kulipia Pencheni za Wazee.

- (a) Je, mwaka 2016/2017 zilitumika kiasi gani cha fedha kwa ajili ya uzinduzi wa mabaraza mapya ya watoto ya Shehia.
- (b) Je, kuna mabaraza mangapi ya watoto yaliyoanzishwa katika Jimbo la Konde au Wilaya yoyote ya Micheweni.

Wizara ya Kilimo, Maliasili, Mifugo na Uvuvi:

75. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Kilimo, Maliasili, Mifugo na Uvuvi:

Kwa muda mrefu sasa kumekuwa na ahadi ya ujenzi wa soko kubwa la samaki la Malindi, ambao kuwa ujenzi huo utafadhiliwa na washirika wa maendeleo wa Japan. Hata hivyo, mpaka hivi sasa hakuna dalili za ujenzi wa soko hilo.

Je, ahadi ya ujenzi wa soko hilo imekwama wapi.

133. MHESHIMIWA OMAR SEIF ABEID (Jimbo la Konde)
- Atamuuliza Mheshimiwa Waziri wa Kilimo, Maliasili, Mifugo na Uvuvi:

Kwa kuwa Serikali imejenga kituo cha kuzalisha vifaranga vya samaki kilichopo Beit el – Ras kwa lengo la kuwanufaisha wananchi wetu na kuwaongezea kipato sambamba na kupunguza tatizo la upungufu wa samaki hapa Zanzibar.

- (a) Je, Kituo hicho cha kuzalisha vifaranga vya samaki kimeshaanza kuzalisha vifaranga hivyo kama ilivyotegemewa, na kama bado ni lini Kituo hicho kitaanza kazi za uzalishaji ili wananchi wetu waanze kunufaika na mradi huo.
- (b) Kama uzalishaji umeanza, ni wananchi wangapi na maeneo gani ambao wamepatiwa vifaranga hivyo sambamba na kupatiwa elimu ya kutosha kuhusiana na ufugaji wa samaki.
- (c) Kama mpango huo umeanza na kuonesha mafanikio, Je, Serikali haioni kwamba ipo haja ya kupiga marufuku uingizwaji wa samaki kutoka nje ili kumlinda mvuvi na mfugaji wa samaki wa hapa Zanzibar.

Wizara ya Ardhi, Makaazi, Nishati na Mazingira:

80. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Ardhi, Makaazi, Nishati na Mazingira:

Pamoja na bei ya umeme kupanda na kuwaumiza wananchi, bado kumekuwa na usumbufu kwa wananchi hao wanaokwenda kununuwa umeme kwa vile vituo vya ununuzi ni vichache na vyengine vimefungwa kabla ya wakati kama vile kituo cha Malindi na Gulioni na kunakuwa na msongamano mkubwa wa foleni kwenye vituo hivyo vichache vinavyobakia.

- (a) Serikali haioni haja ya kuja na mkakati mpya wa kuuza umeme kwenye vituo vya mafuta kama wanavyofanya wenzetu wa nchi jirani.
- (b) Serikali haioni ni vyema sasa ikatafuta mtu au Kampuni binafsi ikasimamia huduma za kuuza umeme.

82. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Ardhi, Makaazi, Nishati na Mazingira:

Kumekuwa na Malalamiko kutoka kwa baadhi ya Wawekezaji wa sekta ya Nishati ya Mafuta kuhusu Mamlaka ya Nishati Zanzibar (ZURA). Malalamiko yao yanahusu kwa baadhi ya Wawekezaji kupatiwa ruhusa ya kufanya biashara ya mafuta kwenye vituo ambavyo havijajengwa “kenope” na baadhi ya Wawekezaji wengine kutopewa ruhusa kama hiyo.

Je, Kwanini Mamlaka ya Nishati Zanzibar (ZURA) inafanya ubaguzi wa namna hiyo kwa wawekezaji, kinyume na Katiba ya Zanzibar ambayo inatoa haki kwa kila mtu kufanya shughuli halali za kuendesha maisha yake bila kubaguliwa au kubugudhiwa.

Wizara ya Afya:

121. MHESHIMIWA OMAR SEIF ABEID (Jimbo la Konde) – Atamuuliza Mheshimiwa Waziri wa Afya:

Kwa kuwa Jumuiya ya Maendeleo Jimbo la Tumbe katika kituo cha Afya cha Tumbe kwa mashirikiano na wananchi, walijitokeza kujenga jengo kwa ajili ya kupatikana huduma za mama wawazito kuweza kujifungulia hapo hapo kituoni pao. Ujenzi huo umefikia hatua ya linta na kusubiri kumalizika jengo hilo ili liweze kutoa huduma.

- (a) Je, Wizara ina mpango gani wa kumaliza jengo hilo ili wananchi wa Tumbe wapate kufaidika na huduma hiyo.
- (b) Je, Serikali haioni kumalizika kwa jengo hilo kutapunguza shida za kina mama hao.
- (c) Je, Serikali haioni endapo itamalizia jengo hilo itawafanya wananchi kupata ari na moyo wa kujitolea zaidi ili kuibua miradi mengine ya maendeleo.

Wizara ya Ujenzi, Mawasiliano na Usafirishaji

150. MHESHIMIWA ABDALLA MAULID DIWANI (Jimbo la Jang'ombe) - Atamuuliza Mheshimiwa Waziri wa Ujenzi, Mawasiliano na Usafirishaji:

Pamoja na pongezi kwa Serikali ya Mapinduzi ya Zanzibar katika suala zima la kubinafsisha shughuli yote ya usafiri wa baharini na kumpongeza Muwekezaji Mzalendo kwa uwezo wake wa kumiliki asilimia kubwa ya usafiri huo, lakini bado kumejitokeza baadhi ya changamoto mbali mbali katika shughuli hiyo kupitia vyombo hivyo.

- (a) Je, Serikali imetoa ruhusa ya kuendeshwa vyombo hivyo katika eneo binafsi la Muwekezaji huyo yani Mtoni Marine.
- (b) Je, sehemu hiyo lini imeanza kutekeleza shughuli hiyo katika eneo hilo ambalo halina hata vikosi vya Ulinzi vya Zanzibar wala Polisi.
- (c) Serikali imejipanga vipi katika kukabiliana na matokeo mbali mbali yatakayotokea katika eneo ambalo sio rasmi.

186. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Ujenzi, Mawasiliano na Usafirishaji:

Kwa vile kituo cha ukaguzi wa afya za abiria wanaotoka na kuingia Zanzibar kupitia Bandari ya Malindi ni muhimu kwa nchi yetu, na kukosekana kwake kunaweza kuhatarisha afya ya nchi nzima kama vile kusambaa magonjwa hatari ya ebola, mafua ya ndege n.k. Hata hivyo, bado eneo la bandari ya abiria vituo vyote muhimu vimepatiwa nafasi ya kujenga ofisi lakini Kituo cha afya ambacho ni muhimu zaidi hakijapatiwa nafasi ya kuwa na ofisi yake.

- (a) Je, kukosekana nafasi ya ofisi ya kituo cha afya si kuhatarisha afya za wananchi wetu kwa vile uhibitaji wa uingiaji na utokaji wa maradhi hautafanyika kwa ufanisi.

- (b) Hatua gani za haraka zitachukuliwa kwa kituo hicho kujengwa haraka haraka katika Bandari ya abiria Malindi.
- (c) Kwa kuwa imeonekana mwekezaji hana tatizo na uwepo wa kituo hicho isipokuwa washauri wake, je Serikali ambayo ndiyo dhamana wa kusimamia sera ya afya nchini, haioni ulazima wa kumlazimisha mwekezaji wa eneo la bandari ya abiria kutoa nafasi ya ujenzi wa kituo cha afya.

III. TAARIFA ZA SERIKALI:

Waziri wa Nchi, Ofisi ya Makamo wa Pili wa Rais:

Taarifa ya Utekelezaji wa Maazimio ya Hoja ya Baraza la Wawakilishi kuhusiana na Uingizaji na Utumiaji wa Madawa ya Kulevya Zanzibar.

Waziri wa Nchi, Ofisi ya Makamo wa Pili wa Rais:

Taarifa ya Utekelezaji wa Maazimio ya Hoja ya Baraza la Wawakilishi Kuhusiana na Uimarishaji wa Mfumo mzima wa Kisheria Unaohusiana na Uendeshaji wa Kesi za Udhalilishaji wa Wanawake na Watoto.

Zanzibar,
22 Juni, 2017.

(Raya Issa Msellem)
KATIBU WA BARAZA.